

Falsche Verdächtigunga



Schier hät 's a große Ehekrise bei seine Eltra gäba, wäga dem, was do mei Nochbr sellamol a'gstellt hot.

Wo der no drhoim bei seine Eltra g'wohnt hot, so etwa mit sechzeah, hot 'r ällamol wieder mit seine Kamerada – wenn d' Eltra net drhoim warat – dui Bar in der elterliche ruschtikala Schrankwand aufgmacht. Nadierlich hend dia Kerle dia Schnaps- und Likörflascha net bloß a'guckt, sondern emmer wieder a bissle dra tronka. So isch des ibr a lange Zeit ganga. Aber se hend emmerhin soviel A'stand g'het, dass se en jedera Flasch no a Stümple drenna glassa hend. Dia Eltra hend des au gar net g'merkt, weil dia garnia ebbes aus dr Bar g'holt hend.

Aber no isch der Tag komma, wo dia Eltra Bsuauch kriagt hend ond noch em Essa a Schnäpsle hend offeriera wella. No hot dui Muadr de erscht Flasch en d' Hand gnomma ond feschtgstellt, dass bloß' no a klois A'standsreschtle drenna isch. No hot se de zwoit Flasch en d' Hand gnomma ond feschtgstellt, dass bloß' no a A'standsreschte drenna isch. No hot se de dritt Flasch en d' Hand gnomma ond feschtgstellt, dass bloß' no a A'standsreschte drenna isch ... ond so isch 's grad weiterganga. Mit ganz sonderbare Gedanka hot se dui Klapptür von dera Bar wieder zu'gmacht, sich bei de Gäscht entschuldigt ond sich wieder an da Tisch g'setzt.

Erscht viele Jahre später, wo mei Nochbr längscht erwachsa war, hot er dia Gschicht mit dem gemeinschaftlichen Nippa an dene Schnapsflascha drhoim v'rzählt.



No war's seine Eltra wesentlich leichter om 's Herz. Denn dr Vaddr hot denkt, d' Muadr dät heimlich saufa, ond Muadr hot denkt, dr Vaddr dät heimlich saufa ...

Wie hoißt an guadr aldr Trenkspruch:

Iss ond trenk,
solang dr 's schmeckt,
scho zwoimol isch ons 's Geld verreckt.

Zum Wohle!
Ihr
Wulf Wager